

■ COLUMNA

«Punts» ed il princip da Lola

DA GION FRY

Trist ch'i na dat betg pli el, il liom linguistic tranter las valladas rumantschas cun il num convenent Punts. Quai ch'ìls hardliners da la front idiomatica proclameschan gia daditg e vehementamain, numnadamain da sa sparter in da l'auter per savair smardegliar en l'agen micocosmos idiomatich e dialectic, quai han las giuvnas PunTistas ed ils giuven PunTists ord las differentas parts da la Rumantschia dumagnà senza grond brimbori – els èn sa deliberads da la pupratscha che nagin vuleva pli.

Cler, l'emprim fai mal in zic. Lura suondan las dumondas, la mancanza da chapientscha, reproschas a sasez ed als auters, aggressiun envers quels che havevan savì e stuì sustegnair la gasetta, ed a la fin suonda il mender – l'indifferenza.

Jau sun persuadi ch'il burlem ardent da la Pro



idioms viaden en il gaud pacific dal rumantsch grischun ha brischà giu las frastgas dals pigns. Inqualin sa dumonda instinctivamain «daco e per tgi duai jau insumma anc scriver rumantsch?» Ina dumonda giustifitgada. Ma lain sviluppar vinavant quest patratg: Tge senn fa quai sche l'autur sa ch'il lectur boicottescha ses artitgel sche quel è scrit en la lingua da scrittura? E tge senn fai da scriver per surmiran (ca. 2000 persunas san anc leger surmiran), u per puter (era ca. 2000 persunas), u per valler (ca. 4500 persunas), u per sursilvan (ca. 13 000 persunas)? Questas cifras pledan per sasez. Ma quai è anc betg tut. Il fatg è che mo ca. 40% da questas per-

sunas legian insumma mintgatant insatge e da quels che restan lura èsi probablamain puspè mo ina pitschna part che legia magari rumantsch, e da questas paucas persunas che legian rumantsch èsi lura puspè mo ina pitschna part che legia sulettamain texts en l'agen idiom... Il fazit è simpel: Il sulet che legia pia l'artitgel da l'autur è l'autur sez.

Quai è uss forse in zic surfatg ed jau sper ch'jau saja betg il sulet che legia questas lingias. La finala ha quest cumià er in aspect positiv. Sch'ins lascha numnadamain dar insatge, han ins dus mauns libers per insatge nov. René Egli predi en ses cuedesch «Das Lola-Prinzip» (LOsLassen) la deliberaziun d'enormas energias e l'avertura da novas perspectivas. En quest senn giavisch jau als davos acturs sin la tribuna da la giuvna gasetta interruman-tscha bler spass e plaschair cun novas sfidas ed orizzonts empermettends.